

**KOMISIJA ZA TUMAČENJE I PRAĆENJE PRIMJENE  
KOLEKTIVNOG UGOVORA ZA SLUŽBENIKE ORGANA UPRAVE I SUDSKE VLASTI  
U FEDERACIJI BOSNE I HERCEGOVINE**

Na osnovu člana 71. Kolektivnog ugovora za službenike organa uprave i sudske vlasti u Federaciji Bosne i Hercegovine („Službene novine Federacije BiH“, broj: 98/23 i 46/25), Komisija za tumačenje i praćenje primjene Kolektivnog ugovora za službenike organa uprave i sudske vlasti u Federaciji Bosne i Hercegovine (u daljem tekstu: Komisija), povodom zahtjeva Kantonalnog suda u Novom Travniku broj:06 0 Su 020931 25 Su od 26.5.2025.godine za tumačenje odredbe člana 24. stav 6.i 7. Kolektivnog ugovora za službenike organa uprave i sudske vlasti u Federaciji Bosne i Hercegovine, na 14. sjednici Komisije održanoj dana 12.01.2026. godine, donosi:

**O D L U K U**

o tumačenju odredbi člana 24. stav (6) i (7) Kolektivnog ugovora za službenike organa uprave i sudske vlasti u Federaciji Bosne i Hercegovine

I

Utvrđuje se tumačenje odredbi člana 24. stav (6) i (7) Kolektivnog ugovora za službenike organa uprave i sudske vlasti u Federaciji Bosne i Hercegovine, kako slijedi:

„Rukovodilac je, na osnovu prijedloga neposrednog rukovodioca, obavezan donijeti rješenje kojim se unaprijed utvrđuje potreba za obavljanje poslova drugog radnog mjesta. Rješenje se donosi za svaki mjesec, te se u skladu sa navedenim rješenjem vrši isplata pripadajućeg uvećanja za mjesec utvrđen rješenjem.“

II

Ova odluka primjenjuje se na sve organe i institucije iz člana 72. Kolektivnog ugovora, čija je sindikalna organizacija članica reprezentativnog sindikata Samostalnog sindikata državnih službenika i namještenika u organima državne službe, sudskoj vlasti i javnim ustanovama u Federaciji Bosne i Hercegovine (u daljem tekstu: Samostalni sindikat).

III

U skladu sa odredbom člana 71. stav (6) Kolektivnog ugovora, ovu odluku su dužne poštovati sve ugovorne strane ugovora.

IV

Ova odluka će se dostaviti podnosiocu zahtjeva i Samostalnom sindikatu putem Federalnog ministarstva pravde.

## Obrazloženje

Komisiji je dostavljen zahtjev Kantonalnog suda u Novom Travniku broj:06 0 Su 020931 25 Su od 26.5.2025.godine za tumačenje odredbe člana 24. stav 6.i 7. Kolektivnog ugovora za službenike organa uprave i sudske vlasti u Federaciji Bosne i Hercegovine, po pitanju retroaktivne isplate po osnovu uvećanja osnovne plaće za procenat do 20 % radi obavljanja poslova drugog radnog mjesta.

Imajući u vidu navode iz dostavljenog zahtjeva, Komisija ističe da je odredbom člana 24. stav (6) Kolektivnog ugovora utvrđeno da će rukovodilac organa, na prijedlog neposrednog rukovodioca, donijeti rješenje kojim se osnovna plaća državnog službenika i namještenika uvećava za procenat do 20%, za period u kome, pored poslova svog radnog mjesta, privremeno obavlja i poslove drugog radnog mjesta, uz obavještenje sindikatu.

U stavu 7. iste odredbe utvrđeno je da je rukovodilac organa iz stava 6. ovog člana obavezan donijeti posebno rješenje o privremenom obavljanju poslova drugog radnog mjesta, koje se donosi za svaki mjesec pojedinačno.

Imajući u vidu navedeno, Komisija ističe da je za primjenu odredbe člana 24. stav 6. Kolektivnog ugovora potrebno da budu ispunjeni određeni uslovi koji se odnose na radno mjesto i izvršioca. Naime, potrebno je da se radi o sistematizovanom radnom mjestu sa opisom poslova čije je izvršavanje od značaja za redovan rad i funkcioniranje organa, a koji se ne obavljaju iz razloga što je isto nepopunjeno ili zbog odsustva postavljenog izvršioca (privremena spriječenost za rad, porođajno odsustvo i sl). S tim u vezi, u svakom konkretnom slučaju se prilikom donošenja rješenja rukovodioca organa cijene pomenute okolnosti, a posebno da li je izvršavanje navedenih poslova od značaja za redovan rad i funkcioniranje organa. Kada je u pitanju izvršilac koji bi u skladu sa rješenjem rukovodioca privremeno obavljao poslove drugog radnog mjesta, isti bi morao ispunjavati opće i posebne uslove za obavljanje poslova radnog mjesta za koje se ukazala potreba njihovog privremenog obavljanja. Imajući u vidu navedeno, za primjenu navedene odredbe Kolektivnog ugovora od važnosti je da li taj izvršilac ispunjava opće i posebne uslove koji su propisani za obavljanje poslova navedenog radnog mjesta, kao i činjenica da se radi o obavljanju poslova drugog radnog mjesta, a koji poslovi nisu obuhvaćeni opisom poslova radnog mjesta na koje je zaposlenik raspoređen.

Shodno navedenom, utvrđeno je tumačenje odredbe člana 24. st. (6) i (7) Kolektivnog ugovora, kao u tački 1. ove odluke.

Obzirom da je odredbom člana 72. Kolektivnog ugovora utvrđena primjena istog u odnosu na organe i insitucije na koje se ovaj kolektivni ugovor primjenjuje, utvrđeno je kao u tački II ove odluke, dok je tačkom III utvrđeno da su ovu odluku dužne poštovati sve ugovorne strane ugovora, u skladu sa odredbom člana 71. stav (6) Kolektivnog ugovora.


Broj: 01-714-67/26

Sarajevo, 12.01.2026. godine

Članovi Komisije za tumačenje i praćenje primjene Kolektivnog ugovora za službenike organa uprave i sudske vlasti u Federaciji Bosne i Hercegovine




Vedran Škobić



Tijana Babić



Samir Kurtović



Haris Karačić